

全  
浙  
詩  
話

全浙詩話卷五十二

會稽陶元藻篁村輯

男

廷珍

編次

廷琬

仁和朱文藻映濬

參訂

同邑宗聖垣芥颿

國朝

閩秀

林以寧

以寧錢塘人西仲先生女錢石臣妻

青瑤詩話 錢塘錢石臣室以寧哭程夫人詩云忽駕

青鸞返碧虛瓊花吹折痛何如修文應是才人盡徵到

姮娥舊侍書天上修文幾成套語一經點化頓覺鮮妍

吳 巽

巽嘉興人鄭聯妻

青瑤詩話 嘉興鄭聯室吳巽妾舉一子誌喜云窮薄  
還憑世澤存朝來弧矢喜臨門翻嗟姑舅先朝露未得  
生前一弄孫

珊珊

珊珊山陰人楊可師女金祖靜配

海嶼詩話 山陰楊可師女珊珊鄉思樓斷句云嗟予  
未識鄉關路甘載空言鄉思樓淺淺語自是遠神

韻山

韻山忘其姓氏山陰胡捷配

菊坡詩話 查心穀爲仁之妻金含英玉元工吟咏賦  
夜合花云朝來紅艷儘教看底事燈前欲見難應是名  
花深自愛五更風雨怕摧殘未及期年而卒韻山卽取  
其咏夜合花之意詩以弔之曰嫣紅取次歛幽姿正是  
簷牙日墮時可惜夜長難得旦重開不見費相思

張德蕙 朱德蓉

德蕙字楚縵山陰人祁忠敏公長子奕慶配

德蓉字趙璧會稽人祁忠敏公仲子奕禧配

湖海樓婦人集

黃運泰毛奇齡撰越郡詩選一書其

凡例曰閨秀則梅市一門甲於海內忠敏擅太傅之聲  
夫人孕京陵之德閨中顧婦博學昌才庭下謝家尋章  
摘句楚纓趙璧援婦誠以著書下客湘君樂諸兄之同  
硯其他巨室名姝香奩綉帙董陶徐鄭詠覽頗多玉映  
靜因流傳最久編題姓氏約十二家閨閣風流莫此爲  
盛識者以爲實錄云張楚纓名德蕙適祁奕慶朱趙璧  
名德蓉適祁奕禧祁下客名德瓊祁湘君名德蒞嘗見  
山陰徐緘詩云箕子國中許小妹錦官城内王夫人風  
流曠代不相接筆陣一門驚有神今觀諸祁才藻以方

許似猶過之楚纓鬪牌詩難遣離懷白晝昏紅牙牌裏  
強爭論不因嬌嬾無情緒輸却金釵未敢言趙璧和湘  
君詩海棠枝上落深紅花片隨香散碧空但得與君同  
轉側不愁此夜逐春風湘君夜坐詩夏雨初晴後長空  
萬里天花間吹玉笛月下數金錢宿燕驚猶語簷榴墮  
欲然齊紈裁自好棄置是何年奕禧贈女弟湘君詩深  
閨小妹動盈盈盤內題詩早得名初見落梅能弄笛還  
宜新月照彈箏又云春花點點逐春江春水悠悠渡夕  
陽空留匣琴千種恨空留錦字三載香匣琴錦字無消  
息故將天壤怨王郎

俞桂

桂字瓊英仁和毛先舒有聞俞瑠英集詩

湖海樓婦人集

仁和俞瓊英詩文纔一十六篇才思

頗清綺遇合抑塞年二十而夭其擬義山無題云纔唱

驪歌日漸曛牽裳官道淚紛紛紅英陌上花無主錦翼

雲中雁斷群玉鏡幾時還照影金爐從此罷燒薰聞知

天上無離別願得相攜駐白雲江南古意云江南三月

花柳香青春欲組白日長杏梁陰陰燕新乳頰頰羞池

弄輕羽美人午起自結束曳鬢垂鬟手如玉春草滿園

蝴蝶飛金鞍少年他日歸中秋云玉鏡澄清漢金波蕩

碧流桂枝應欲謝空倚最高樓

陸么鳳

么鳳錢塘人

湖海樓婦人集 么鳳善吟咏嫁夫遊學於外陸頗愁  
思秋閨晚思三首云晚來疎雨過人頭風靜羅衣颺不  
休漫拾亂紅題小字暗驚新句又悲秋湖烟漠漠晚棲  
鴉自掃楓香坐煮茶一帶芙蓉寒映水那知秋思屬兒  
家翠黛宜頻不耐頻病逢秋氣轉傷神空堂莫挂疎簾  
起黃菊丹花惱殺人

柴貞儀



貞儀字如光杭州人

湖海樓婦人集 柴貞儀杭州人也能詩其咏羅巾絕  
句云拭去盈盈淚攜來冉冉香殷勤纏素手縷縷似愁  
腸亦極有思致

李因

因字今是號是菴海昌人

湖海樓婦人集 李因作水墨花鳥幽淡欲絕王吏部  
嘗題其芙蓉驚鷺絲畫云寒入金塘花葉孤非烟非雨  
態模糊姚家女子丹書絕寫作芙蓉匹鳥圖姚月華小  
傳嘗作芙蓉匹鳥也李是葛光祿無奇夫人著有竹嘯

軒集以節著

吳 柏

字柏舟錢塘人

湖海樓婦人集 錢塘女子吳柏未嫁而夫卒柏衰麻  
往哭遂不歸母家苦節十餘年遭疾夭歿所著有柏舟  
集數卷詩極鍛鍊詞尤富而長調更絕工不減徐夫人  
湘蘋也古文尺牘在明暎之上真奇女子矣

貞烈沈氏

桐鄉人

桐鄉縣節烈志

貞烈沈氏玉溪貢生有涵妹同里姚

白汝言言  
卷五  
上  
濂聘婚有期濂卒氏聞之哀號欲奔喪父母阻之吞金  
瀕死飲以藥愈知其志不可奪送之往哭奠已卽執子  
婦禮主中饋暇攜刀尺伴夫靈終三年喪囑其繼子曰  
讀書佳且命營葬作絕命詩云少小曾翻烈女編敢將  
心跡擬前賢只知從一而終義一命追隨到九泉卽于  
刃其喉不死復吞針如故夢其夫曰汝死當效夷齊耳  
遂絕粒卒年二十有三事在康熙丙申之夏學憲馬豫  
獎曰志貞從一邑侯姚某獎曰節烈流芳

吳瑛

字若華錢塘人吳嗣爵女平湖屈恬波室著芳

孫書屋存稿

青瑤詩話 嘉興屈恬波室吳若華制藝極工小題錄  
刻近隆萬人嘗有新磨古鏡句云閱世興亡疑有眼辨  
人好醜總無聲 又秋風詩云滿耳蕭騷夢不成殘雲涼  
月夜淒清等閒吹落長林葉雜入千家擣練聲

隨園詩話 吾鄉多才女河督吳公汝屏有女名若華  
留別淮陰官署云三載依依玉鏡前舊梳粧處最相憐  
不知今後紅窗裏又是何人點翠鈿

杭澄

字清之晚號定水老人仁和人世駿妹歸趙萬

曝著卧雪軒吟草伏枕吟

道古堂文集 妹爲先府君次女母王太孺人卽吾母  
女弟也歸於趙 聶曰萬暲恂恂溫克雅相器重閨房唱  
酬而妹才較勝聶以几案才參人幕事恒他出青燈苦  
雨望遠懷人皆妹攢眉覓句時也余赴 召之京妹寄  
詩有有金買書不買田語遂爲吾一生實錄

胡慎容

慎容字觀止一字卧雲山陰人會稽馮恒配著  
有紅鶴山莊集

越風

紅鶴與同懷姊慎淑子景素堂姊慎儀字采齊

俱負雋才稱胡氏三才女紅鶴夫亡後以貧困隨姊采  
齊游嶺南鬱鬱死無子有一女卽思慧壻洪洞劉侍御  
秉恬

按予當戊寅己卯在嶺南會見紅鶴年僅四十并晤  
其馮恒年小於胡是時思慧纔十三齡今觀耕亭所  
載謂夫亡後始同姊遊嶺南誤矣予女蘊素聰穎早  
亡心甚痛之有秋燈夜讀遺照一幅嘗攜行笈中海  
內名流題咏頗多紅鶴亦有句云十五盈盈掌上珍  
便教烟化入埃塵香消綉絮餘殘線月冷瑤階認舊  
身秋院無聲細帙掩銀缸有影玉釵新  
分明夢綠雲英侶忍話神仙謫後因

商可

可字長白雲南知府商盤之女會稽人

越風

亭亭玉立有林下風未出閣而卒寶意太史痛

惜之輯其遺詩爲曇花一現集

畫漁餘話 咏芒鞋如杭堇浦板橋霜外跡紅葉雨中  
聲咏酒帘如董嘯巖芳草社前雨杏花村外樓咏苔如  
商長白昨宵疑有雨深院斷無人皆絃外獨絕之韻然  
杭與董名宿多才尚無足異若長白乃寶意太史掌珠  
以一綉閣弱齡而超妙至是宜乎甫十九而凋謝如曇  
花之一現也按咏苔上句用潘逍遙夜涼疑有雨下句  
則將玉溪生日長深院斷無人截去上兩字妙於咏苔  
天然恰合此尤善能驅使者

按長白咏苔詩昨宵疑有雨深院斷無人可  
與金壽門遇雨纔三月無人又一年金傳

姚益鱗

益鱗茗溪人嚴林溪配

隨園詩話 茗溪女子姚益鱗嫁嚴林溪以天亡送姊  
之泮溪云姊妹花窗下相依兩意同拈針五夜火拜月  
一襟風忽忽遂分飛雁都爲斷梗蓬擬將茗水濶送盡別  
離衷閨七夕云微雲依約接銀河一月佳期兩度過倘  
把重逢歡較昔翻教添得別愁多

柯錦機

錦機青田人

隨園詩話 青田才女柯錦機有宣文夫人之風絳帷



問字者數十人同鄉韓太守錫胙猶及見之誦其送夫  
應試云劍匣書囊自檢詳冬裘夏葛賦行裝西風忽送  
來朝別明月休沈此夜光見說試文容易作須知客感  
最難防莫夸司馬題橋柱富貴何如守故鄉

高氏女

高氏女湖州人

隨園詩話 閨秀李金娥咏路上柳云折取一枝城裏  
去教人知道是春深湖州小女有一聯云也知春色歸  
人早鄰女似邊有杏花

張瑤英

瑤英杭人王健菴配

隨園詩話 國初逸老某贈妾云香能損肺熏宜少露  
漸沾花採莫頻王健菴妻張瑤英示兒云教兒寶鴨休  
添火龍腦香多最損花瑤英有綉墨詩集余已爲刊刻  
矣茲再錄其佳句送健菴云縱無多路情難別須念衰  
親遊有方病目云豈爲愁多清淚落却緣烟重午炊遲  
偶成云無夢不愁雞唱早有書只望雁飛過荒院草刪  
三徑潤破窗風入一燈危蛛知網濕添絲急月待雲開  
到檻遲 戊戌春余在杭州兩姬置酒招女眷遊西湖  
瑤英以詩辭云呼女窗前看刺鳳課兒燈下學塗鴉韶

光一刻難虛擲那有閒看湖上花旣而遣人急之曰娘子不來怕作詩耶果飛輿而至到湖心亭書二十八字云釀花天氣雨新晴一片清光兩岸平最好湖心亭上望滿堤人似水中行

沈袁氏

錢塘袁枚之姑母

隋園詩話 姑母嫁沈氏年三十而寡守志母家糸幼時卽蒙撫養凡浣衣盥面事皆依賴於姑姑通文史余讀盤庚大誥苦聲牙姑爲同讀以助其聲嘗論古人不喜郭巨有詩責之曰孝子虛傳郭巨名承歡不辨重和

輕無端枉殺嬌兒命有食徒傷老母情伯道沈宗因縛  
樹樂羊罷相爲嘗羹忍心白古遭嚴譴天賜黃金事不  
平余集中有郭巨埋兒論年十四時所作秉姑訓也

袁機

機字素文錢塘枚三妹

隨園詩話 余三妹名機字素文秋夜云不見深秋月  
影寒只聞風信響闌干閒庭落葉知多少記取朝來着  
意看閒情云欲捲湘簾問歲華不知春在幾人家一雙  
燕子殷勤甚銜到窗前盡落花他如女嬌頻索果婢小  
嬾梳頭怕引遊蜂至不栽香色花皆可誦也遇人不淑

卒於隨園香亭弟哭之云若爲男子真名士使配參軍  
信可人無家枉說曾招婿有影終年只傍親

袁 杼

杼字靜宜枚四妹

隨園詩話 四妹名杼字靜宜遊雞鳴寺云蒼蒼烟樹  
帶斜暉石塔層巒傍翠微無復蕭梁宮殿在臺城猶見  
紙鳶飛秋園踏月云靄靄山光映碧空參差樹影亂西  
風蘆花幾朶明如雪吹在橫橋曲澗中他可誦者如描  
花嫌紙窄學字借書鈔賓鴻雲作路蟋蟀草爲城畫閣  
偏聞雛燕語亂書常被嬾猫眠課女云花簪一朶休嫌

少字課三張莫厭多挽葛姬云斷線幾條猶委地南樓  
一榻已生塵余在蘇州四妹寄懷云長路迢迢江水  
寒蕭蕭梅雨客身單無言但勸歸期速有淚多從別後  
彈新暑乍來應保重高堂雖老幸平安青山寂寞烟雲  
裏偶倚闌干忍獨看余讀之凄然當卽買舟還山四女  
琴姑從妹受業妹贈以詩云有女依依喚阿姑忝爲女  
傳教之無欲將古典從容說失却當年記事珠

按袁機有鐙影三更夢曇花  
頃刻身之句亦工警可傳

袁 崇

崇字秋卿枚堂妹

隨園詩話

堂妹棠字秋卿嫁揚州汪楷亭家頗溫飽

伉儷甚篤咏燕云春風燕子今年早歲歲梁間補舊草  
華堂叮囑主人翁珍重香泥莫輕掃吁嗟乎千年田土  
尚滄桑那得雕梁常汝保余讀之不樂曰詩雖佳何言  
之不祥也已而竟以婉難亡又二年楷亭亦卒妹寄二  
兄香亭云鵬程人與白雲齊君獨年年借一枝聞道故  
交多及第更憐歸客尚無期琴書別後遙相憶雪月窗  
前寄所思常對芙蓉染衣鏡堪嗟儂不是男兒子歸揚  
州云不堪回憶武林春嬌養曾爲膝下身未解姑嫜深  
意處偏郎愛作遠遊人綠楊堤畔行遊子紅粉樓中冷

翠帷爲問秦淮江上月今宵照得幾人歸亡何香亭哭  
以詩云寂寞高堂念懷中小女兒至今傳死信未敢與  
親知書遠墓多誤人稠語屢歧調停兩邊意暗泣淚如  
絲

陶姬

姬蘇州人錢塘袁枚側室

隨園詩話 余屢娶姬人無能詩者惟蘇州陶姬有二  
首云新年無處不張燈笙鼓元宵響沸騰惟有學吟人  
愛靜小樓坐看月高升無心閒步到蕭齋忽有春風拂  
面來行過小橋池水活梅花對我一枝開生女嫁蔣氏



姬年三十而亡

陳淑旂

淑旂山陰人

隨園詩話 山陰女子陳淑旂晚思云弱質怯春寒名  
花帶月看惜花兼惜影不忍倚闌干

葉氏一門閨秀

隨園詩話補遺 吾鄉多閨秀而莫盛於葉方伯佩蓀  
家其前後兩夫人兩女公子一兒婦皆詩壇飛將也先  
娶周夫人映清甲戌聞捷云雙眉欲展意猶驚起聽銅  
鈺屋外聲不惜雕梁驅乳燕泥金帖子挂題名秦家上

計動經年歸夢何由向日邊今日離情暫拋却知君身  
到大羅天春蠶詞云蠶生戔戔滿庭隅但願蠅無鼠也  
無大婦裹鹽呼小婦前村趲早聘狸奴典衣買葉不論  
錢要趲晴明乍暖天却似靈和殿前柳春來三起又三  
抵令阿細入學云低鬟憐阿姊與汝亦齊年且令拋針  
線相隨共簡編雙行知宛轉坐咏愛清圓試看俱成誦  
今朝若箇先其他佳句如都門卽景云擣杏新添調酪  
梳篸瓜不惜買冰錢首夏云花因辭樹偏多態鳥爲催  
春已變聲夏日卧病云小倦何心燒白朮薄陰有信近  
黃梅柳綿云乍從野水官橋見只傍鞭絲帽影飛 繼

娶李夫人含章刺綉詞云朝綉長短橋暮綉東西嶺生  
不識西湖道是西湖景羅稀不受針縑密不容線綉好  
有人知綉苦無人見夏晝云午樓風暖試輕紗語燕聲  
中日未斜滿地綠陰簾不捲游絲飛上蜀葵花長沙節  
署感賦云廿年咏絮鳴環地今日隨君幕府開

時外攝中丞事

畫閣乍迎新使節春風猶憶舊粧臺殊恩象服慙難稱  
遣愛棠陰待補栽聞道江城輿頌美如冰樂令又重來  
夫人爲吾同年李鶴峯之女鶴峯曾撫湖北故有感而作也萬固寺云山寺不知路

忽聞流水聲溪隨巖石轉塔與白雲平古木尚無際幽  
禽時一鳴松根堪小憩試汲碧泉清題李白詩後云千

勿翬孤鳳高歌一代中在天猶被謫入世豈能容膽落  
高驃騎思深郭令公再回唐社稷諸將莫言功望樵兒  
不至云濟南秋八月接汝數行書報說重陽日能迴上  
谷車已驚楓落後又到雪飛初何事歸期誤臨風一倚  
閭二篇皆一氣呵成真唐人高手也其佳句如咏始皇  
云車載輶輶山有鬼舟行縹緲海無仙望岱云海外天  
光明野鳥寰中人影動蜉蝣並頭蕙蘭云風靜謝庭群  
從集月明湘浦二妃歸重至都門云每歷舊遊疑隔世  
暫休征旆當還家常州道中云路已近家翻覺遠人因  
垂老漸知秋又兩兒下第云得失由來露電如老人爲

爾重踟躕不辭羽鍛三年翮可見光分十乘車四海幾  
人雲得路諸生多半壑潛魚當年蓬矢桑弧意豈爲科  
名始讀書見解高趣可與三百篇並傳矣 其女公子  
令儀春陰云碧窗人起怯春寒小立閒庭露未乾牆外  
杏花堦下草引人長倚碧闌干舟夜云小艇低昂睡不  
成夜深猶自促歸程滿窗涼月白於雪艇底忽聞魚鼈  
聲初夏偶成云躑躅花開暮雨餘送春天氣此幽居棋  
枰半取殘箋補詩草時尋退筆書節序關心殊苦樂韶  
華過眼有乘除年來怕上蘇堤望愁見垂楊綠映裾其  
佳句如村景云帆影多從空隙過溪光合向鏡中看偶

成云多病堦前時晒藥畏寒窗外亦垂簾 其長媳長

生吾鄉陳句山先生之女孫也春曉云翠幕沈沈不上

鈎曉來怕看落花稠紙窗一線橫斜裂又放春風入畫

樓太真春睡圖云秘殿春寒倚綉茵君前底事效橫陳

馬嵬更有長眠處也傍梨花一樹春寄外云弱歲成名

志已違看花人已隔春闈

兩上春官以迴避不得與試

縱教裘敝黃

金盡敢道君來不下機頻年心事記冰紉絮語煩君仔

細看莫道閨中兒女小燈前也解憶長安春日信筆云

軟紅無數欲成泥庭草催春綠漸齊窗外忽聞鸚鵡說

風箏吹落畫簷西春園偶賦云賣鵲聲裏日初長春滿

閒庭花事忙樓外軟風鶯夢暖籬邊疎雨蝶衣涼碧桃  
重似垂頭睡紅葯殘如半面粧看盡韶光應不倦題詩  
長倚小迴廊其佳句如硤石道中云樹遠作人立山深  
疑雨來春夜云濕雲壓樹暝烟重淡月入簾花氣幽聞  
家大人旋里云去郡定多遮道吏還山已是杖鄉人

次媳周星薇亦工吟咏少年早夭以故詩多失傳僅錄  
其悼鸚鵡云羽毛纔就慘奇霜敲斷銀環恨渺茫連日  
誦經知有意昨宵說夢已非祥綠衣原是藏金屋丹詔  
何年下玉堂應伴飛瓊充鳥使綵霞深處任迴翔 陳  
夫人之妹淡宜亦工詩都中寄姊云鵲原分手各天涯

風雨聯床願尚賒兩地空煩詩代簡二春祇有夢還家  
病多漸識君臣藥別久愁看姊妹花他日相思勞遠望  
五雲深處是京華

周菊香

菊香永嘉人

游甌紀聞 甌婦女多能詩喜爲吳下粧俗生女三歲  
必纏足故甌女皆弓足可愛予寓甌有女狀元周菊香  
者善詩文尤妙解音律結十番社詩社於城西一題出  
唱和者多至數百人皆閨中傑也因摘其佳句錄之咏  
蓮居寺竹云春苞和露坼秋影帶烟浮山行云野燒留



樵路村樓隔爨烟山花云紅墮無人處青成有脚春野  
望云斷雁續殘影孤雲界遠山霜闌云冰凍有時敲玉  
筋壅寒無計卜金釵村居云山花無語隨春老明月多  
情照客眠靜香齋閑咏云紈扇因風輕蛺蝶疎簾有月  
淡梅花詩思雋永直不減班香薛艷矣

陳小蘭

小蘭永嘉人

游甌紀聞 陳小蘭才色兼美許字未嫁而寡父母欲  
強嫁之女曰以女之才而不得相一名士寧守死不嫁  
有對能對者字之對曰鳥恨春歸銜住落花啼不得至

今十餘年無人能對者

汪景蘭

景蘭永嘉人

游甌紀聞 某邑宰子某作虞美人草詩和者甚多皆不甚佳惟閨秀汪景蘭一首獨絕其詩云春殘歷亂滿園陳芳草空憐姓氏真艷質不垂紅粉淚嬌姿猶學細腰人庭前拍掌迎風舞垓下聞歌翠黛顰開遍江南與江北倩誰爲賦洛川神

陳素安

素安字定林侍御鴻寶女弟仁和人沈世燾配

有生秋閣詩

紫竹山房集 侍御寶所姪女弟素安字定林行五能  
詩而吾不知信乎吾之爲癡叔也顧世之論者每云女  
子不可以才名凡有才名者往往福薄余獨謂不然福  
本不易得亦不易全古來福薄之女奚啻千萬億而知  
名者代不過數人則正以其才之不可沒故也又況才  
福亦常不相妨風詩所載如古后夫人之作無論矣自  
漢以下如曹大家之文衛夫人之書至爲名士低頭宮  
娥受學可謂薄福乎此特就才擅其絕者舉似一二其  
他嫺文事而享富貴以沒世者亦復不少何謂不可以

才名也大易家人之象辭曰言有物此非專爲男子位  
外者訓也物者事也言中事理之謂物言合古事之謂  
物誠能於婦道餘閒流覽墳索諷習篇章因以多識故  
典大啟性靈則於治家相夫課子皆非無助以視村姑  
野媼惑溺於盲子彈詞乞兒說謊爲之啼笑者譬如一  
龍一猪豈可以同日語哉又經解云溫柔敦厚詩教也  
柔與厚皆地道也妻道也由此思之則女教莫詩爲近  
才也而德卽寓焉矣生秋閣詩大體清雅尤多酸楚之  
音大抵於思親憶兄及懷感弟妹姑姊之間三致意焉  
可謂得詩人之本而不惟其辭鏗而不已吾何能量其

所至也特以其遲久而後出若有戒心於世俗之論才女者故爲進一解以廣之作才女說

隨園詩話 杭州沈觀察世壽妻陳氏名素安字定林咏賣花詩云房櫳寂寂閉春愁未放雕梁燕出樓應怪賣花人太早一聲聲似促梳頭水墨裙云百疊波紋縐墨痕疎花細葉淡生春窈娘病後腰肢減綢尺休量舊日身病起云幾日無心課小娃晴窗睡起自分茶重簾不捲紗幮靜落硯何來數點花

陳玉賢

王賢錢塘人太僕兆崙姪女適壻施光遠

紫竹山房集

憶花斷句八首其七咏金鞭子云玉筍

啼殘兒女粧金絲花葉引鞭長何年盼到春風好付與  
王孫馬上揚自注云僕家園近有此花姪女玉賢七律  
末二句如此豈爲堦施郎秋闈報罷而作繩兒爲予誦  
之深憐其意故不與易

錢貞女

貞女不著其名桐鄉人

笠亭詩集

桐花集

貞女桐鄉人許字嘉興某氏子未婚

夫亡女以父老無子誓終身不嫁奉親焉除簪珥去華  
飾已一年矣突有委禽者女知父意不可回題絕命詞

有句云不隨桃李開春風卽以原聘紅絲自經聞而義  
之爲作朱絲嘆侯采風者詩云艷艷朱絲繩相牽始成  
匹成匹亦其常何心立奇節奈以同功絲不作同心結  
通名未相見一朝便永訣雖未結同心早以誓同穴泣  
涕奉朱絲躊躇顧白髮相持不敢言相依亦暫活皎皎  
閨中心明明天上日心與日光明不隨月盈缺朱絲繫  
生死朱絲寧斷絕突來隔幔人欲比攀枝葛養父事不  
終守義志難奪背面辭阿父報恩在專壹緣以朱絲成  
命以朱絲畢桃李紅易篤朱絲未許涅絲絲見素心嗟  
哉女貞潔

趙烈婦

仙居儒士炳旻女同邑張錦妻

三台詩錄 婦被兵難俘至河埠溪兒口聞夫已被殺  
嚼指血題詩衣間投水死見應明經期至張綱倩夫婦  
序論其題衣詩云鼓鼙滿地不堪聞天道人倫那足云  
聽得睢陽空有舌裙釵只合弔湘君

葉素娘

三台詩錄 臨海儒家女名士吳藥圃之室也父珂王  
先生館唐峯愛藥圃之才且謝家甥與葉有連面訂以  
女字之於是兩人以詩相唱和未有嫌也未幾珂玉死



里人煽其事謂吳先別有朱陳之訂百計間阻素娘遵  
父命守貞不字以待藥圃之尋盟者且十年賴郡守張  
公知其事爲成之琴瑟協應樂可知也然素娘命不永  
藥圃痛悼緘其手作一篋示人有十分清瘦在梅花之  
句侯孫承爨門謂素娘才質於古名媛中當兄事若蘭  
弟事淑真卽書法井井亦在文待詔董尚書間又謂素  
娘固孝女其事孀姑又爲孝婦非僅以墨汁脂香流播  
當世也素娘小名伊傳有寒香錄遺草同時又有素輝  
閣女史洪氏爲陳婦三歲而寡矢志柏舟以詩畫自遣  
曾見其和雪玉詩三十首自稱淑江無名女子有東風

不管愁深淺日日開門掃落花及君自團圓我自缺傷  
心怕見月光浮之句惜全篇皆未之記又聞其女弟適  
章氏才名亦與相亞

宋領珍

領珍本名珠揚州人鴛水王樹芳納爲妾工詩  
與嫡鄭蘊英多倡和

雪樵書屋遺稿

王香谷自注

亡妾宋氏維揚人本名曰珠

領珍之名予所贈也予巡鹺時所納素知書後漸能賦  
嗣娶內子閨中倡和如良友然有怯症事余六年而亡  
春秋二十有一予嘗作七夕擬宮詞宋同作云太液池

頭爽氣開露華濕遍翠雲苔捲簾聽噪填橋鵲笑逐嬪  
娥上玉臺挑完錦字夜風賒穿罷金針月影斜再拜雙  
星非乞巧來生莫作後庭花又余嘗於酣古齋中以舊  
句放胆文章拚命酒無腔曲子斷腸詩爲聯內子惡之  
爲改一聯曰人分金谷園中艷筆亞蘭亭會上雄予以  
爲絕妙猶未得內子意也領珍在旁斂衽再拜獻一聯  
云支分茶竈清閒地位置書床淡泊人時予與內子方  
坐書榻也予喜欲狂而內子亦稱善因宋氏能篆命書  
之

衛琴娘

琴娘天台人

三台詩錄 丹徒縣志順治三年十一月甘露寺有一  
婦人死於楊公祠內僧啟其戶見壁上炭書字數行云  
妾赤城弱質也姓衛小字琴娘于歸三月忽遭亂離匝  
地鼓鼙擁之北上歷吳渡淮欲死無所幸以琵琶擊之  
得脫虎口潛逃破面毀形蒙垢廢跡晝乞窮途夜伏青  
草吞聲背泣惟恐人知偶登北固江山滿目不覺涕零  
因爲短吟二首云衣片鞋幫半委泥千辛萬苦有誰知  
幾回僻處低頭看獨自傷心獨自啼又目斷天台旅雁  
長青山綠水杳茫茫不知憔悴中途死竟夢何時返故

卿

陶蘊素

蘊素元藻女年十五而卒

菊坡詩話 余弟篁村有女曰蘊素生而慧八九歲時  
聞諸兄咏詩卽竚聽不去手錄唐詩成帙必於燈下雜  
誦數過年十二適庭前玉簪花盛開余指花笑曰若隣  
珠翠寧非寶可惜雕鏤不是真蘊素平日未嘗能詩忽  
朗吟曰偶插雲鬟全似玉微聞香氣始知花余奇之一  
日其父偶檢舊稿至皖江舟中題有半夜雁橫漢一聲  
秋到舡之句蘊素在旁曰到字易滿字何如父大喜曰

善卽易之嗣是愛憐特甚年十五患痘而卒父哭之慟  
命畫工繪秋燈夜讀圖句詩人題咏頗多佳句常孰邵  
編修齊肅秀水鄭宮允虎文錢塘梁侍講同書三作尤  
爲清麗邵云插架牙籤亂葉聲秋閨夜讀玉缸明洛神  
斷賦書千本肯讓渠專博士名鄭云遺挂空留翰墨香  
綠窗曾做十三行而翁檢點殘書在忍淚封題舊錦囊  
瓊珮聲高紫府天偶然游戲落塵緣來時聞作去時語  
只住人間十五年梁云綠萼前身本是仙深閨無意弄  
珠鈿簪花妙格春椒頌硯匣塵封已隔年蕙質蘭心異  
世芬那堪圓月竟埋雲香山老去金鑿死太息空刊紫

石文才名絕似鮑家姝伏枕關心過嶺輿誰識封胡閨  
嶠返袖中淚濕大雷書蘊素最喜臨十三行帖故諸詩  
皆及之詳見天台齊少宗伯召南夜讀圖記

胡雲英

雲英字小霞會稽人山陰趙連城配

風雅閒談 人稱小霞牡丹詩花稱富貴好人奈賤貧  
何余獨賞其觀競渡云髮鬢雲雲髮別樣嬌輕搖蘭漿渡  
紅橋分明洛水凌波文羅襪生塵學弄潮媚秀絕倫直  
駕昭華而上

全浙詩話卷五十二終

全浙詩話卷五十三

會稽陶元藻篁村輯

男

廷珍

編次

廷琬

仁和朱文藻映溥

參訂

同邑宗聖垣芥颿

國朝 方外

德容

德容字費隱天童寺僧著有漁樵桂飄等集

攜李詩繫

費隱順治初木陳石奇二和尚請繼席天

童時擁衆千餘皆諸方角立之士參叩激揚宗風大振



楊廷鑑貽詩有五峰今日高天下萬指都教拜下風之句

常岫

常岫字蒼林號懦翁又稱松阿樵者姓鄭其先本黃巖人生京師十五歲薙髮於大千佛寺有寒濤閣集

櫺李詩繫 蒼林性沈靜喜讀書其詩高簡冲淡有郊島遺風

通復

通復字文可別號冬關老人嘉興胡氏子

櫺李詩繫 文可深明禪理於儒家書無所不窺詩宗

浣花晚年遊東粵歸格律益高曹侍郎秋岳稱爲畏友

文藻按蘧齋詩話載其送朱人遠入蜀省親詩云棧  
險秋冬際西來有問津巴山原近楚劍閣未離秦迢  
遞驅行子艱難拜老親那懷花早發夢綵正宜春盛  
氣看雄開因深弔古哀空山夏禹廟春草越王臺楊  
馬人何在乾坤眼獨開登  
高須載筆好試大夫才

正崑

正崑字謐堂餘姚人住淨慈寺著有同凡集

漁洋詩話 徐繼恩字世臣武林名士亂後爲浮屠名

正崑字謐堂爲詩清麗不落凡近一字略載其絕句數  
首御教場中月直時下山全不道歸遲三松影落平湖

月一路沿鐘到淨慈晉人名理宗莊老剡縣風流說謝  
支雅爲神州鐘紫氣惜君未見馬駒兒人家竹樹渺茫  
聞浦淑林鬱不記灣安得帆隨湘勢轉爲君九面寫衡  
山幾日春遊徧若耶入城滿面是煙霞正愁仙福難消  
受又喫人間御貢茶扁舟絕壁醉西風千古英雄在眼  
中欲得周郎重回顧銅絃鐵板唱江東坡公所謂無蔬  
笋氣者也

按杭州府志正嘉字豁堂金陵郭氏子七齡絕羣十  
歲喪父依靈隱薙染禮彌陀作偈有善才參後無童  
子更二千年我一人之句所著詩文偈誦語錄若干  
卷尤善書法間畫山水多做元人而越風則謂正嘉  
字豁堂餘姚人住淨慈寺著有同凡集等語僧家住  
持踪跡不常故集中所列亦惟據其現住何處便爲

引載原不必綜其前後也但未經出家之先其俗姓籍貫必有一定杭州府志與越風所載正嘉原籍已屬不同今漁洋又謂其本姓徐名繼思字世臣武林召士則其原籍姓氏似又另屬一人彼此互異未知孰是

### 靈睿

靈睿字攝菴太平人

三台詩錄 南沙文集攝菴本太平鍾姓子方授室遁去爲僧嘗修懺永嘉寺中一老禪自稱宋懺主慈雲大師端坐聽講畢舉古木香爐贈師曰善持之忽不見由是發明若有神助僧膺八十一示寂著有鷲音集羅太師坤曰師博極羣書根推上乘而孝不忘親孤身廬墓

如瞿曇將入涅槃復爲母說法半生演教大旨歸之忠  
孝殆韓子所謂墨名而儒行者居三茅時泉生涸井桃  
發枯枝在四明講大乘經白鵝銜衣而聽者三載比師  
滅度鵝亦與俱靈異不可枚舉師一日晝坐垂目彷彿  
見陳文忠象山先生來與語云上帝命居南天門記善  
惡事兼以餘閒採人間佳句如師題方學祠草詔不從  
惟有死麻衣着後更無人及咏矮桃一絕余已登手錄  
矣羅太史宏載選白岳英華載其事

同人

同人不知其名吳越間僧化於吳興妙喜山

巢枸集

君有崖岸意氣豁然對人侃侃自將間作無

繩尺大語嘗曰卽師天童佛法須翻轉老和尚舌頭耳  
在崑山嘗一登座若有所不樂遂飄然傲放吳越間崇  
禎末年尋余錢塘山寺惻然有把茅之思余時卧疾踉  
蹌三載五遷其居與君後先相伴皆不期然而然已存  
恤故人於潤州道病乃就醫虞山又一年遷化吳興妙  
喜山中年四十三詩曰爲人抗勁語驚人早歲同參晚  
益親江海夢龜腸正折篋笥詩卷墨猶新狂歌豪嘯崩  
千峽劇病奇窮并一身兩次卒聞生死信茅簷搔首對  
秋旻懷奇負氣老叢林頭角駸駸聳莫禁豈必入天酬

半偈固將秋壑老初心高眠古嶂秋雲迴濶步長林夏  
水深文采盡彰消息露石床一片蓋松陰天涯雲水早  
知名末路多艱直道行一往厲身誠是偈幾年相聚信  
如萍汚難從衆嘲奚解淚欲成河哭失聲江上有朋殊  
透網雪溪楊柳伴孤征丙戌春道武康訪黃介子江陰故有此結槎浮居陋  
謾吁嗟吾道聞君卜水涯披荆穉蒙曾破格霍揮偈句  
自成家廿年破笠身無繫一笑孤燈髮半華記得春風  
三月好幾番同看麥田花

道峯

道峯不知其名嘗以事至東甌有紀行詩

巢枸集

壬辰仲春道峯禪師有東甌之役春杪歸自

栢蒼晤余皋亭山居出示紀行詩若干首余疎嬾卧疴  
久荒筆硯觸事興懷感不能已勉賦廿絕以志宏法嬰  
難代有其人焉急速官期非等閒謝公嶺外曉間關龍  
湫歎薄芙蓉路不爲膏車看雁山山亭蓐食候鳴雞不  
住猿聲在崦西一任虛空穿窟寵到頭霜月落前谿豈  
有天書下翠微風流光寵紫羅衣故爲遠折官橋柳馳  
傳來提格外機馬首谿山歷亂生三吳八閩望中平那  
知荷法懸車日只麼區區魴尾頰無事於心任險夷叨  
叨物論勿須齊一雙衰莫頭陀耳千里關山聽鼓聲誣



人以皋皋加之此理昭然不隔絲肘耐勞生頑似鐵杜  
鵲啼血染花枝爲衆身心已殫精那堪殃禍出私門骨  
堆平地無多子籍籍高名北斗尊草覆雙林舊講壇桃  
花浪拍子陵灘浙東山水行將徧回首天台石磴寒扁  
舟兩度汎錢塘畫裏江山記括蒼一曲鷓鴣誰合調扣  
舷還自賦滄浪生還喜得話同風勁色端如雪後松不  
獨魚龍知性命俾他江漢自朝宗直中有曲不須論千  
聖同途各步行恰憶槐都官已後更餘皮襪鼠梅衡濶  
步支那八百州一千餘歲自遨遊何如些子輸君處彈  
指歸來卧竹樓萋兮貝錦織無停古道荒蕪日晦暝磨

衲不披披片席出群風致憶長汀更翻迭覆到官衙  
本無瑕任指加囉哩一聲山失峻夜深明月在蘆花  
爲善吾知亦近刑春風剗刃語如霆巖房花歎香無  
賴棧上黃鸝口不停當世聰明甘露滅一聲大叫歲  
峴頭毘盧海濤風濤濶衝破牢關看鐵牛不言姓氏  
遁終身豈是無徒自了人古聖亦嫌名迹累峴公  
山色翠嶙峋學到絕忘還合轍人因出處始分途  
一回相見呵呵笑我是寒山破落瓠霏霏山雨月  
明樓蠶豆羹香正麥秋盡意淹留餐一飯褰裳谷  
口又登舟曉窗鷺粟半含姿嬌似楊妃睡起時一  
宿草堂人去後滿庭香霧濕荼蘼

中明

中明日公

名先一字

雲棲勝蓮居僧著山居詩

巢枸集

山居詩序

雲棲古大師之闡法武林也座下多英

偉士記其尤者有三人焉曰一融圓曰正之授其一則  
吾法師中明日公法師時年三十五六氣象春容衆望  
之以爲克昌五雲之家而不承夫正化者也後數年圓  
與授皆早世獨法師駸駸乎作獅子吼於桐江之左硤  
石之顛以至杭之雲棲別室勝蓮居焉方是時禪門鼎  
盛天下學者趨其風如百川歸壑法師獨以曲水一曲  
唱出西溪使義學一宗若雷驚電蜚日月繼明由是吳

浙之間咸謂扶教有人而法輪再轉也暨余自太白歸  
養病皋亭法師已投老黃鶴峯之陰有年矣因得聚首  
於高寒之野談笑於寂寞之濱法師則往往言中有響  
絕處逢生則又喜其不以教來自束自割溝垣故十餘  
年或把臂松間或聯床雪夕未嘗不以陷虎之機嶮巇  
之句相揆授也甲午仲秋法師示寂其徒彥寂上人哀  
其山居詩若干篇且欲謀梓以傳請一言以弁其首抑  
余聞之本深而末茂形大而聲宏法師早歲詢方童真  
味道其本不已深歟於台賢性相諸宗之書通透貫徹  
其形不已大歟然則夫詩也者非末與聲之謂乎宜乎

葱龍而暢茂清越而鏗宏况一吟一嘯由乎天機發乎  
性靈不存枝葉不襲眈眈者哉余嘗受教古師之門悼  
一人之早世每唯法師爲五雲之麟趾乃不得大煥所  
懷今又舍我而遠遊故於是詩尤惓惓焉乃不辭而畀  
之序

寂然

寂然字靜遠錢塘僧姓孫居青芝塢由菴著影  
菴集選燔剩集散語

巢枸集

由菴者名寂然字靜遠武林錢塘人也姓孫  
莫知其上世所自出少失恃怙鞠於其祖母氏異穎異

有至性祖母疾亟剗股肉以療其疾母奉佛惟謹恒指  
師謂人曰兒非凡器也乃命薙染於鄰之老僧月江焉  
師時甚幼出則承師入則侍母兩室一身孜孜矻矻以  
故里人稱孝密雲和尚開法金粟師往參問父母未生  
前話雲以手掩面擘開眼曰猶師遂醒悟百丈耳聾黃  
蘗吐石信知有者般時節後雲遷住育王繼主天童師  
皆隨往師以禪者間得一知半解復欲求師承印可以  
謀其所欲爲如市井短販成風故在衆一意晦藏縣縣  
默默不現聲彩卽甚知師者亦莫測其何爲也在育王  
主樵爨居天童理畚鍤雜作之具嘗語人曰古人直入

西山與隔江趨去何等磊落今時涇渭不分別口便說  
大話我欲爲人壞了也學者固所存何如耳詎可以是  
爲得哉由是浩然退歸故棲所謂下寧橋影菴者藝蔬  
以爲糧埽葉以爲炊局闕獨處不與世接惟借靈峯經  
律論之說而日夕披究焉久之以所居淺露疚於心有  
告以青芝鵠在北高峯之左寶石塔之右北枕秦亭山  
南瞰錢塘湖有茂林修竹薜蘿石壁之勝朝霏夕暉湖  
光如鏡市聲不喧蟲鳥交迹足資養以休老師又栽其  
黃葉埽其白雲峯爲之益青泉爲之加碧玉潤山秀故  
由菴之美愈不可揜矣平常不肯辭色假人好以古道

規勸卽以二三麤行其食息時頃晨昏節度灑掃進止凜然如臨萬指以故諸方禪者雖有甚飲高名冀就藻鑒往往爲之望崖與人交初若冰炭旣久也則又外形骸示情懷披衣倒屣不啻饑渴故一時鳴道之士若敎若禪咸樂與之遊而諦好焉莫年喜種松其所居蕭然黯黯無虛地故有不樂時人望此間種松密密自遮菴獨看萬象無今古娛老何須分外緣之句蓋師爲人簡嚴好持高節訥於言而辨於文其所著述類皆別開蹊徑以不襲舊爲主故其一歌一咏往往皆有邁古之氣出入意表平時存問故舊不預籌慮意至卽行雖盲風



怪雨酷日凝寒不憚也降茲則不妄曳踵獨鳥啼殘雪  
則樵中漁服鶴步湖隄焉己亥六月復疾手書別所知  
曰後事累兄逾十日書二偈而逝師善草書有影菴集  
選燔剩集散語行於世壽六十三塔於所居由菴之側

智遠

智遠字空林崑山朱氏子住四明知止菴

巢栢集

師諱智遠字空林別號泯巖蘇州崑山朱氏

之子弱冠其季父有爲浮圖法者從之雍染於其邑之  
景德寺求遇善知識參聞谷印和尚於真寂密雲悟和  
尚於金粟無異幟和尚於博山遊匡廬患疾五老峯下

幾死附雪嶠老人結茅於徑山石壁鳴崇禎辛未從悟  
和尚住天童至壬午姚江人士闕四明宣家塢精舍奉  
師棲隱其間順治丁亥往來吳越之間吳越士人書幣  
相望崑山則以水居冰菴者請錢塘則以山居黃龍菴  
者請茗溪則以村居石墩者請師皆勉爲應命或麗一  
寒或消半夏特以西湖山水之勝不能忘情故漫不爲  
十洲三峽之遊而卒奄脫於拈花院者有以也師以文  
字之學最爲障道時以少許餘習間作歌詩隨作隨棄  
一無留焉示寂後歸於宣家塢

姚江逸詩

遠把茅徑山出參圓悟於金粟悟引爲入

室其後悟死凡平日品題所及者皆請同門補授衣拂  
或徑拈香上座遠深鄙之故其詩有解行自捫無愧作  
姓名何必上傳燈

簡和尚

杭州干雪松僧

山齋客談 雪松僧號簡和尚閩人明進士爲某縣宰  
後隱於沙門築室江滸名斑竹園又曰龍勝菴有手植  
松柏猶存杭士王漢臣先生故閩籍產於浙嘗有過斑  
竹園詩曰雪松廿載切心儀斑竹園林過客稀遺像隱  
然成佛子留題宛爾是騷詞湘妃淚染空山翠龍樹神

依古石枝一塔難埋千載恨我來何處託相思

大悲菴僧

名字未詳

清波小志 康熙六年丁未正月十六日爲先處士誕辰設栢酌以款親朋忽聞巷外大悲菴前有僧人自言卽日焚化親朋停盃往觀見此僧置木龕於地遍辭街坊坐入龕內具紙筆於前題一偈云無拘無束不清不濁放到皮囊正月十六又書七言律詩一首云道我狂時不是狂今朝收拾臭皮囊雪中明月團團冷火裏蓮花瓣瓣香好向棒頭尋出路卽從業海駕歸航滿爐骨

拙都煨盡十字街頭作道場書畢將龕門手掩火發於  
內須臾示寂矣是時觀者數千人卽有然香羅拜者此  
僧向不知於何處棲身亦忘其名號今從容坐脫亦禪  
門中有手眼者

曇噩

曇噩四明僧

所見錄 諸士人於紹興南門外舟中分韻賦詩一老  
僧坐舡尾請韻共賦皆慢易欲難之故予蕉字韻未幾  
一揮而就云平明飯後促篙梢撐出五雲門外橋來越  
王城一百里到曹娥渡十分潮白翻晴雪浪飛舞綠弄

晚風蒲葉搖西北濃陰天欲雨卧聽蓬韻似芭蕉方共  
驚擱筆詢之乃知爲四明僧曇噩云

南潛

南潛字月巖烏程人

國朝詩錄 月巖董姓說名本貢生中歲出家吳之靈  
巖寺詩思路手筆俱不凡無多偏歆殊少完善茲錄於  
近情者如和唐人宮人入道云聽斷昭陽鼓吹聲道家  
衣向御前更已拋團扇三秋怨却勝琵琶萬里行留錦  
祇謀裝秘笈買絲還擬綉飛瓊天家異日齋香使白髮  
宮奴記舊名

無名和尚

二台詩錄 和尚台州人住吳中消夏灣破巷不持經  
卷絕粒半月不死食可盡三斗米能米有浙西名流集  
包山詠梅押雲字未成和尚口吟云椒眼幾粒裏寒霞  
鐵骨一條眠斷雲衆奇之又如咏糞溷云悟得眼前乾  
矢擲始知佛在糞坑邊咏足腫云直待臨終啟予足始  
知全受與全歸有偷兒過或命賦卽云勸汝回頭服王  
化歌衢便作帝堯民皆佛心儒理兼而有之然對文士  
不盡交言強問之卽故亂其辭曰驢兒屋鴨兒屋不解  
作何語也雍正癸丑冬十月化去事見沈某文集又口

號云電光三癸丑住世可無住青山萬壑雲是我來時  
路此將示寂時作云三癸丑計其生當在前明神宗時  
矣

碧雲

碧雲俗姓趙名甸字口功會稽人初爲諸生鼎  
革後出家同時尚有董無休王白岳寺共逃禪  
爲雲門十弟子

越風 雲幼有至性善畫山水九歲時值窮冬鴻雪父  
出古畫令易米雲掩扉朗吟曰吾家有古畫其價重連  
城不易街頭米歸來雪滿罌父聞欣然曰有子如此雖



饑何憾嘗以母故出妻數月感悟乃返里中皆稱爲趙孝子

元璟

璟字借山平湖人出家於會稽

居易錄 會稽釋子元璟字借山平湖人投詩爲贊頗有秀句如相思若鷗鳥咫尺隔風烟隣衲司吟卷門生致酒錢風曳鵝黃淺寒吹鴨綠平坐看春牒子吟到闔閭城清鐘來木末白鳥落風湍人家收柏子楓葉著霜花晚蕊分竹圃秋水繞籬根烟中多翡翠花裏又鈎輈一笛破寒渚千航湊夕陽懶呼猿引客閒許鹿參禪試

看青苗茁倒浸碧玻璃又過楊鐵崖故里詩卜築精藍  
似淨名愛其三絕擅平生桑條綠滿門前徑客到幽禽  
啼數聲瘦策衝泥訪鐵崖銅坑小喫雨前茶無端攪亂  
春愁客屋角一枝山杏花玉削群峯抱一村甘泉如乳  
出雲根負薪伐竹扶犁叟多是楊家十葉孫

按借山爲木陳和尚再傳弟子康熙間遊京師放誕  
不羈牛籠初貴人多惡之謂非菩提種子而心實無  
他爲詩秀健頗除蔬笋氣如盧溝橋云日色纔分萬  
衆靜黃塵漠漠馬蹄驕題詩笑問桑乾水曾有聞人  
過此橋馬家山云山脚山腰盡白雲晴香蒸處畫氣  
盡夫公領畧詩人意不遺花開到十分二詩大似見

評

寒泉

全浙詩話

卷五

南

寒泉平陽寺僧後住持天童寺

西河詩話 天童曉公爲平陽宏覺法師嗣順治中曾  
住大內萬善殿後遇余吳下予有詩云道上逢師俱在  
客塵中念佛是何人可憐不識東山路花落花開幾度  
春公詩云烟開別路沙頭柳月照多情江上人太白一  
燈遲雪後莫教相望過殘春蓋公時招予入山故云也  
若予則信手拈此漸聞杼山云公初以念佛是誰得悟  
似余素知其事者詩句之神合乃爾

柳亭詩話 吾越平陽寺爲宏覺國師道場中燬於火  
辛未歲寒泉老人復爲營繕襄其事者余與劉存白聞

人漢遠老人旣以倡授余復以三絕付漢遠曰耶溪上  
溯洞天開繞屋山花石上栽雲路險巖山又滑知君不  
是等閒來當年神運殿尤奇木湧崖泓且十圍修德媿  
予非惠遠却煩公等鵲銜枝喜怒常看未發前個中儒  
釋本同源功名會見探囊得預作吾宗禪狀元未及十  
年殿復燬老人已住天童祖席於乙酉春具疏請額得  
傳燈寺三字其建興可立俟矣

### 成濬

成濬字靈淵秀水人雲林落染住疊石寺

蓮坡詩話 秀水靈淵成濬雲林諦暉之門人也住諸

暨之疊石寺能詩善飲曾有句云梅花三竺雪楊柳六  
橋烟頗清婉可諷與余友余荆帆懋檣極善一日偕荆  
帆渡錢塘江荆帆有詩云十載軟塵爲客久一江小雨  
共僧還大有畫意

嘯隱

嘯隱字奕是平陽寺僧

西河詩話 天台石巢有瀑從天半而垂下注絕澗遊  
者每言百丈外便衣濺若雨花稍近一似有風從澗底  
生者然極難摩畫惟嘯隱奕是一詩頗得其概遠訪名  
山踏翠叢石梁百尺鎖長空瀑花飛作入林雨潭水翻

爲倒壑風方廣僧歸松徑月曇花鳥下食臺鐘此來應  
有三生約須信閻浮路不通方廣寺曇花亭皆石梁近  
境 天台桃花洞亦稱桃源嘯隱和尚奕是嘗受平陽  
付荊曾行腳是山屢至其地詢之云洞在溪奧處有小  
口甫入便峰壑窈窕滿山皆桃花不植自茂且喜無雜  
樹每行數里以爲境盡矣忽回旋得路便得復入如是  
三十餘里至山盡處見大洞在天半爲猿狖所居不可  
登則亦異也時奕公有詩流霞深瑣洞門偏河口桃花  
紅欲然入路總愁丹壁截緣崖如傍玉衡旋溪流不斷  
千年水山氣長如二月天最愛村童樵唱去還梳了髻

學神仙

原志

原志字碩揆靈隱寺僧

蓮坡詩話 靈隱和尚碩揆原志偶成云我亦年年澗  
谷師孤雲相引下茅茨人間只競春光好五月松風賣  
與誰訪石壁主人不值云乞米江城僧未歸孤雲斜日  
冷柴扉欲書庭葉留名字恐逐西風下嶺飛二詩可入  
宏秀集中

元宏

元宏字石庭會稽人著有高雲詩集

西河詩話 中元節越城多作盂蘭盆會時石庭宏公  
寓香城寺寺北樓正當戴山卽故越王采戴地也舊有  
兼山亭今纍纍特茹塚耳石庭與旣白鐵夫兩和尚夜  
坐見諸祀孤者吹螺擊鉢繞山脚至山嶺盤行而上每  
三丈許燒紙錢一堆凡百十堆須臾火燼梵樂從前山  
遠去里許而絕山頂一堆忽死灰燦發初看有火如毬  
色正赤根淺碧迴旋而起散爲千萬火淡綠微紺宛若  
攢星是時山樹城堞俱皦然復見灼灼然中有縞衣者  
約數百輩圍火廵視若檢括其中之所有甚有搶攘顛  
僕卧不能起者刻餘復分一火毬移至次堆其捷如飛



以次而下凡百十堆無不如是眞怪事也次日過余話  
其事且出三公聯句示余石庭詩云野火青熒明復滅  
照見衣冠縞如雪婆娑彤影倚西風偃蹇鬚眉對秋月  
鐵夫詩云微光未散紛爭挈餘燼猶存互糾結孤墳寂  
寂卧麒麟腐草翻翻宿蝴蝶旣白詩云我乍觀之搖精  
魂及久視焉辨毛髮梵影杳杳鐘鼓沈夜色蒼茫泣幽  
咽

蓮坡詩話 高雲和尚高風逸品卓越一時所著詩文  
如蒼松翠竹老而愈秀有溪泛詩云溪喧如虎歇翻雷  
臨水人家酒店開雨腳雲頭還不散畫眉聲裏竹舩來

題徐芝仙水村圖云小橋流水幾人家點點浮鷗水上  
斜釣艇魚罾疎柳外半江晴雪覆蘆花寄人詩云北窗  
檀樹盡成龍塵外高眠鶴夢空一徑飛花春雪白半簾  
疎雨夕陽紅向受紅蘭主人供養後住平陽寺有高雲  
詩集紅雪秋聲詞康熙丁酉來都過余西廟利那接話  
覺有夙契因授余偈其詳載花影菴雜記 高雲老人  
重上長安秋日懷舊詩三十首鉛華掃盡獨出性靈今  
記其數首云老病無聊客况難死生情重憶紅蘭夢中  
猶喜分明見淡寫黃花帶雨看指紅蘭主人也又江南  
留得顧梅花老去詩篇興倍加猶作梁園舊賓客西風

殘照送昏鴉指顧爾立也又古香西席憶徐陵天上麟  
兒拜老僧十七年前曾受記寸心今托玉壺冰指徐芝  
仙也又水南莊上有髯公與我同年話始終留寫楞嚴  
了了義雁王共禮白雲中指宗室拙齋公吞珠也水南  
莊在東便門外二閘河邊又最愛紅椒晚更香碧蘿翠  
竹映虛堂胸中別有真高節獨對秋山畫夕陽指借山  
上人也又一卷清詩冰雪寒馬驢第一說貞觀而今閱  
盡江南客滿眼風塵見亦難指桐城方貞觀也又海內  
都將詩句誇盡從狐媚托嬌花長沙獨立人偏遠望斷  
汀洲雁影斜指陳恪勤公也

柳亭詩話 寒泉以文字妙香代爲佛事一時會下諸人莫不異口同聲裒然成帙獨石庭宏公爲能擺落一切自成機杼其全集予嘗序之西山和尚取入法苑英華皆琅琅可誦也宏公爲姚孝子後裔孝子名希唐號春墅以事母棄官歸與季彭山錢緒川王龍溪陳海樵遊徐文長詩所謂春墅山人性頗怪海縣爲官懶束帶卽其人也孝子以孤貴贈太常少卿其墓在石碁爲人盜賣石公走京師丐錢贖之不可乃以其募資建孝義祠於故里其詩有鬼夢三年雙淚盡死生萬里一身歸之句紀實也

按石庭送沈梵陵赴楚詩云天末美人多塞北長  
安名士半江東此等句不知蔬筍氣消歸何處

正普

正普字廣賢東陽人

金華詩錄

正普工五言南山草堂云竹深僧夢綠花

密鳥聲香華嚴院酬心融大師留別云拈花因悟果擊  
竹爲心虛頗有九僧遺韻

彬遠

彬遠名未詳又號嘯翁老人杭郡棲禪院僧

清波小志

學士橋側有笑隱菴又名法喜院老僧笑

魯者居之予童時見其人自言從董宗伯其昌陳徵君

繼儒游故其書法不落時蹊每朝夕往來橋畔眺望湖  
山意有所得輒賦小詩予惜未覩其集一日舉一鐙千  
古夢萬壑老僧寮二句示予是時予未知詩不解其何  
意也後歸天台年餘復來沒於菴中繼席者爲翼菴其  
徒彬遠奕是俱能詩彬遠別字秋蟾詩尤超縱大有青  
蓮風味

元暉

元暉字鑒微蓮花精舍僧工畫善鐵筆

雲蘿齋詩話

上人住城東蘭若卽南宋畫院舊址也

康熙癸酉夏日作納涼圖長卷繫以絕句云柳綠荷香

近水瀟瀟涼忘却暑中身清風不用一錢買能消受者  
便主人

超源

超源字蓮峯錢塘人主吳中怡賢禪寺

國朝詩錄 蓮峯詩揣摩王孟舉釋典元妙融化出之  
殊有空山冰雪氣象有友人枉過開化寺詩云青眼多  
情客攜朋問暮秋人同山共瘦時與水俱流黃葉迷村  
路清風滿寺樓荒涼郊外景肯向錦囊收

義果

義果字巨濤俗姓章丹徒人雲林寺僧有嫵草

行人集

雲蘄齋詩話

巨濤年十一父命出家於焦山及長祝

髮受具於西山潭柘寺德新和尚至杭侍雲林諦公執  
役九年無怠容師命參三不是話禪堂中時問不是心  
不是佛不是物是甚麼語未竟師打一竹篋因有省卽  
呈偈云一擊敲開海底天塵塵刹刹盡歸源當場拈出  
無私句鐵馬嘶風躍九原師領之旋受付囑任監院事  
按巨濤詩筆頗捷其和韻尤能工穩甲子歲余偶過  
靈隱口占一律巨濤和余稜字韻曰學道喻車期台  
轍論心似月貴無稜蓋卽東坡續佛  
印天愛禪心圓似月之意運用殊佳

上緒



上緒字亦諳號近溪錢塘人初住棲霞嶺歸雲  
塢旋主葛嶺涵青院著有盃後集

桂堂詩話 釋上緒字亦諳號近溪天骨蒼秀陶汰獨  
深里中詩人若徐山人逢吉金布衣農符戶部曾厲孝  
廉鶚皆與酬和沈嘉轍陳撰兩上舍往來尤密閒遊當  
湖入洛如詩社五言最勝鐘聲秋寺遠月色夜峯明小  
雨紛如霧秋雲望若空鳥聲啼鳩晚花信刺桐遲偶語  
故人共卷帷明月來踪跡猶萍汎顛毛又歲除泉聲兼  
磬起春雨較冬寒皆直闖王岑之室

演中

演中字大恒後改明中又字焚虛桐鄉施氏子

住持 聖因淨慈天竺有焚虛大師遺集

香樹齋文集 恒上人明中七歲投楞嚴寺爲僧梵誦

之餘兼習書畫嗜爲詩無蔬笋氣主淨慈講席適予予

告里居曾過淨慈遺一聯云山空不厭僧常住詩好何

妨客屢過 上四次巡浙 幸寺中見予所題聯卽

問和尚也能作詩麼上人跪奏云臣僧曾學作詩 上

頷之因 賜一絕句

道古堂集 焚虛僧膺五十一世壽五十八辭世偈曰

五十八年一報周謝家活計霎時收披蓑赤腳千峰去

不問蘆塘舊釣舟

按大恒性情泊如舉止恬雅固是佛門種子生平善  
畫淡墨山水其水石蒼秀頗近井西老人余不至西  
湖者二十餘年大恒已圓寂數載昨偶閱其遺詩五  
言特雋如虎邱云情知無味話敢對石頭看送人歸  
徑山云不因真個嫌那得許多閒過平和橋云魚蝦  
爭小市鷄犬亂孤邨雨中送春云落花成小劫流水  
悟前因皆不  
媿詩僧妙品

篆玉

篆玉字讓山初爲淨慈僧後住萬峯山房有話

墮集

畫漁餘話 萬峯釋讓山性耽吟咏余嘗見其五律有  
涼話竟忘久松風不斷吹一聯下句景狀先從涼話中

攝起此老真得詩禪三昧矣

實月

實月字智朗號漁陸杭郡理安寺僧著南磧吟  
草

隨園詩話補遺

方坳塘觀察過訪談及禪僧智朗號

漁陸上元人性至孝母歿出家住持理安歸省母墓云  
風木驚心二十年偷生只爲學金仙誰知杖錫歸來日  
荒草叢中化紙錢蓬鬢荆釵苧布裙夕陽影裏淚紛紛  
趨前欲訊重泉恨吹過西風一片雲改葬云別後匆匆  
掩一棺多年淺土忍重看故衣斷線痕猶在靜樹搖風

首已寒西崦可憐通夜夢南陔空說潔晨餐慈恩欲報  
終難報徒向平原意少安

全宋詩話卷五十三終

全浙詩話卷五十四

會稽陶元藻皇村輯

男

廷珍

編次

廷琰

仁和朱文藻映濬

參訂

同邑宗聖垣芥颿

國朝

雜錄

永中善宋詩

西河詩話

嘗集姚江朱氏園有同席客係甬上少年

盛稱永中爲宋詩者是時方入門卽指其地曰假如卽  
事詩鮮有能道見前者其人能之綠草當門長似柴中

間留得一條街不依然此境乎唐人籠統焉能有此予  
笑魄之須與少年去座客並起問適何以不答予曰此  
何足答也生平凡卽境偶有感發每欲道一語必不得  
唐人無不有曾在牛首寺夜坐見暗禽孤飛同遊白孟  
新吟李洞詩竹裏橋鳴知馬過塔中燈露見鴻飛予豁  
然有省旣而遊山東宿荏平關廂遠燈明昧譙鼓斷續  
不能作詩及見錢起宿新里館詩有度燭螢時滅語嚴  
維宿荆溪詩有寒更出縣樓卽先廣文兄移新居時外  
垣花竹不能統買予時正作詩贈兄甫沈吟間記唐人  
移居有全無竹可侵行逕一半花猶屬別人句閣筆而

羅是世上見前凡人意所欲道者唐人何一不道過高  
遺山謂過從宴會並無佳句以酬應多也予謂唐人卽  
不然如宴會詩其在小集則有竹徑春來掃蘭鐙夜不  
收句花間宿席石上遺甌宛然目前其在高宴則有金  
勒控迎詞客去紅氍鋪待舞人來句櫺廡橫槽勾欄設  
毯恍然當日至若里居住往來庭堦蕭寂則有冷巷閉門  
無客到暖檐移榻向陽眠句最爲可思園林疎曠几闌  
悠然則有白練鳥飛深竹裏朱絃琴在亂書中句極可  
想見至於蟬曳殘聲過別枝關戶暗蟲猶打窗風簾斷  
處落殘珠山雨欲來風滿樓其當前妙句膾炙人口者



隨舉有之不能悉也且善賦草者非一團茅草亂蓬蓬  
之謂也據如所云即使見前寫出亦俚鄙可厭人自無  
學不見唐詩耳唐詩如此境甚多釋無可詩纖草連門  
留逕細馬樓出樹見山多韋莊題其秀才山居草色似  
袍連徑合白雲如鳥傍檐飛彼只一句而其言已盡若  
韋詩只連徑合三字尚有餘閒以青袍作秀才一顧此  
詩中三昧也若只草長如柴一團茅草謂之汚人口寫  
之藏人筆何苦爲此自無學者謂唐詩籠統不知唐詩  
最刻畫曾讀唐人試詩否當光化戊午年長安省試其  
題是春草碧色時中式進士爲殷文珪王獻等皆用題

春字作韻其詩有嫩葉舒烟際輕陰接水濱金塘明夕  
照輦路惹芳塵諸句鄭子真見之以爲未盡其義因別  
作一詩中有窗紗橫映砌袍袖半遮茵天借新晴色雲  
饒落日春嵐光垂處合眉黛看時嘖何刻畫也

塘樓衣工

槐塘詩話 塘樓衣工有句云竹榻借溫新稻草布衾  
添煖舊棉花詞頗超拔惜失其名石門陳秀才樹人說  
平湖秀才

隨園詩話 壬寅春余遊西湖寓漱石居閒步斷橋遇  
一少年問路愁容可掬叩其故曰平湖秀才來游湖上

進錢塘門行李被竊無處投宿予疑不實問既是秀才  
可能詩乎曰能命咏落花操筆立就有句云入宮自訝  
連城價失路偏多絕代人余大驚留宿贈金而別但記  
姓郁忘其名

或戲村學究

隨園詩話 或戲村學究云漆黑茅柴屋半間猪窩牛  
圈浴鍋連牧童八九縱橫坐天地元黃喊一年末句趣  
極

象山俗諺

洄浦農歌

修禊農歌綠野橋銀瓶桑上聽村謠小娃

溪上歸來晚薺菜青青厭翠髻註云綠野橋在象山縣  
治南諺云三月三日晴桑上挂銀瓶三月三日雨桑葉  
無人取上二句見紀歷撮要及升菴外集下二句見玉  
芝堂談薺俗上巳禊除女郎於溪上采薺簪之供於龜  
上巳婦女以薺菜點油祝而灑之水上若成龍鳳花卉  
之形則吉謂之油花上於象俗稍異漫山桃李鬥紅  
英隴上欣看麥穗生人道江南花夜發清和八月最宜  
晴註云石湖詩梅花開時我種麥桃李花飛麥碧叢諺  
云小麥不怕神共鬼只怕四月八夜雨北方花晝發忌  
晝雨南方花夜發忌夜雨見四時占候書昨日龍分雨

不分今朝霖霖暗連村磨刀更有關公誕無俟將軍下  
鋸門註云占候書兩浙以四月二十日爲小分龍五月  
二十日爲大分龍埤雅五月分龍後龍各有分域雨暘  
往往一轍而異俗因謂之隔轍雨諺云二十分龍二十  
雨八十公公去車水二十分龍廿一雨水車圈入衙堂  
裏蓋謂本日雨主旱次日雨主水俗謂關公誕日雨曰  
磨刀雨乾隆初武探花侯潔鎮象山旱禱於鋸門龍窟  
不驗命砲擊者三忽有匹練自韭山來風濤沆瀣山谷  
背震候謝久之乃平 田夫心事似春鳩雨雨晴晴總  
自愁宿雨旣防騎月額久晴又怕打梅頭註云俗謔善

愁者鵲鳩諺云鵲姑姑呼阿婦晴哭晴雨哭雨俗以二  
十四五間有雨轍成泥潦連至後月日騎月雨金樓子  
月旦雨謂之月額袁士元喜雨詩天瓢乍滴終頃刻月  
額初開斷復連諺又云雨打梅頭無水飲牛謂入霉日  
雨主旱見四時月令

種菊謠 鳳仙訣

鳳仙譜 種菊有謠曰未種菊先插竹言菊本細弱須  
竹扶之也鳳仙亦有訣曰欲種鳳仙花須備樹桎杙此  
花盛時滿枝密放一遇風雨頂盡垂下須以細樹叉隨  
其長短架起待晴再去又不損花且無曲屈之患

蒼水張公渡江得無名氏詩

蒼水張公神道碑銘

金祖望撰

公之渡江也得無名氏詩

於船中有云此行莫作黃冠想靜聽先生正氣歌公笑曰此王炎午之後身也

無名氏題西湖壁

不下帶編 客有言頃見一士題詩西湖壁者朱竹垞卽偕吳寶崖與余往觀之則墨濡未燥而其人已去詩云昔來湖上蕩舡頻風日清融二月新橫着一枝臨水麗畫舡看殺捲簾人口日東風第四橋天桃故故泥人嬌春聲只戀啼紅樹不信黃鸝恨不消先生賞其風調

以爲名作惜不著姓名

徐生題貢院號舍

西河詩話 蕭山張宣綸茂才十五歲以科考第一赴浙省其號舍左壁有詩云明遠樓頭漏未終棘牆官燭照來紅最憐此夜麻衣客病在西場號舍中讀之大驚是年中副榜榜未發病死詢之則是號爲前科上虞徐生所居生中式而以病先死是詩其所題也事數之偶合如此

敗壁詩

所見錄 乾隆己丑偶於河埠小巷見壁間詩四章自



署放翁何範墨跡古勁有法惜就剝蝕有云邨是尚書  
姓是劉輶輶轉水泠湫湫農人不識前朝事鑿碎銅駝  
塞稻溝海鹽朱笠亭收入金華詩錄

酒樓題句

畫漁餘話 西湖五柳居酒樓上曾有遊客題壁云山  
翠開朝雨松花落午風句甚佳惜逸其姓名

賣錫老叟

叟山陰人

金華詩錄 叟不言名氏賣錫東陽至盧杞亭館中見  
壁上詩朗吟數過杞亭異之與談叟亦不自衒也一日  
以古墨一挺贈盧并詩一首留別云青山疊疊水悠悠

王粲無歸獨倚樓此去會稽山下路蘭亭絲竹已成秋  
涵青院題壁詩

菊坡詩話 賈似道半閒堂在西湖葛嶺今有僧舍涵  
青院爲半閒故址余嘗往遊之曾見有詩題壁云鳴秋  
廊下小池塘雨漲新痕石髮香廿載昔遊成噩夢殘蕉  
依舊翦秋霜極有風致惜其姓氏模糊不知何人所作  
雙溪畫障

籠鵝館集 雙溪畫障歌序云畫有山江橋舍舟帆釣  
緡枯柳蒼松而紅樹居半無題署姓名有句曰一腔熱  
血無些用灑向千山處處紅下紀庚寅夷則月畫於杜

鵲樓雙溪必勝國遺老之別字也

海鹽酒樓壁間題句

笠亭詩集

瀛洲集

梅花雜咏云幾日秋風拂鬢絲登樓

又及放梅時曲池南畔翠陰裏望斷一叢金桂枝自注  
云入通天火府登酒樓見壁間題句有云曲池南畔翠  
陰裏忽露一叢金桂枝愛其風調感念昔遊率爾成此  
武林客舍題壁

炙硯瑣談 旅居壁間多有閨人題句率皆文士贗託  
如吳漢槎詭名金陵女子王倩娘之類詩格一望可知  
近見武林客舍題壁云深閨羅素不禁秋扶病來尋古

手遊看到紅蕖縹緲處又添新恨上扁舟一望孤帆入  
遠天柔腸空斷白雲邊湘波有盡情無盡兩地相思載  
滿舡庚子八月五日山陰女子題詢之主人的係弱腕  
惜不知其名

綠天女子

香祖筆記 沈礪嘗與友人泛西湖未幾雨作座有請  
乩仙者至則書一絕句云纔散笙歌罷綠么冷風疎雨  
上輕舡問余名字真消息曾向王維雪裏描叩之自云  
綠天仙子賈秋壑半閒堂後植蕉百本余乃其中之得  
靈氣者現美人身侍書於巾峰洞天翌日跡之果有巨

蕉一本樵牧不侵遂釀金構精舍其側自後數降乩與諸生唱和云

### 明霞

述異記 德清蔡崑陽先生長君字麟武者戊午歲召仙預問功名焚符之後其乩忽動題曰誰云富貴卽爲良想到癡肥欲斷腸薄命紅顏今已矣泉臺應愛讀書香又曰生長德清十九年偶隨車馬過茗川知心惟有墳頭草月夜臨風泣杜鵑後寫茗溪十景塘明霞題好事者尋至其處果有石碑題才女明霞之墓蓋明末某太守之女死葬於此詳味其詩必所配非偶抱恨而終

者也

吳耕遇

山齋客談 海陽吳耕字研田別號焦圃寓嘉禾之雙谿卽黃九烟子壻也高蹈不仕清介有古廉士風耕有族兄吳聰字次謀性亦清謹能詩早卒康熙戊寅耕客江右宿村舍中值鄰有請乩者耕亦以扣之乩忽書曰吾弟客此耶扣之誰何曰汝兄聰也與子雅稱兄弟今仙凡隔矣復與子遇豈能無情子詩人也因感唐人劉得仁詩人中最屈之句用申其意以贈子須臾乩運如飛得五言近體一章復扣其所止曰時乘雲氣翱翔於

江山風月間耳其詩曰詩人中最屈蕉圃斫田耕獨具  
蕭閒格無慚月旦評交疎多解佩金冷使餐英才貌哀  
時命莊騷共不平

仙乩暗示

山齋客談 吾杭翰林侍讀陳相宜先生之子積九少  
時叩乩乩曰終身事若何黃金滿覺羅黃猪如遇虎菩  
提薩摩訶以爲陶朱倚頓可望也康熙丁酉科場獄起  
始訊則浙督滿公覺羅保也旣而奏上復 命禮侍王  
公思軼理少金公應壁卽訊皆以大辟覆奏而乩詩驗  
矣

汪貞木家乩詩

山齋客談 汪貞木杭諸生居芝松里夜嘗有青火出  
屋內疑有寶物聚昆弟家人啟之至丈餘無所見惟得  
一石長六尺餘青瑩光潔可作石案以水浴之一屍影  
橫於上家有乩壇衆叩之乩以詩示曰此疾我能知二  
人心在茲亡竟惟小女相見是心期末復大書方孝孺  
三字乩遂寂然衆不悟詩夜更召一仙符畢乩運曰吾  
佐女侍香吏也既聞方詩乃大笑大書哈哈此正學先  
生譏汝等耳語含癡念妄想四字也

西溪女郎薛春暉



品外錄 癸未同人集秋木山房占此書云癡情偏惹  
多情債春月秋光共憐愛柔腸寸結難強排大地河山  
何太隘非關故作輕狂態我本是文君一派後署西溪  
女郎薛春暉衆叩居址答曰苔水盈盈一帶流當頭鎮  
日坐高樓只因情重身非惜姓氏而今不槩留述其芳  
概亦紫玉一流齋恨以終者也今有春暉曲及女郎和  
詩詳載玉鈎亭詩話

計文煥

山齋客談 計文煥仁和平安里人市賈也康熙乙亥  
春病篤心中有三人者出視之與已無二共攜文煥至

一家時夜已半乃從門隙入見一嫗坐堂中間若輩何  
自來耶三人曰此合生汝家媪熟視哂曰故佳因復還  
至家一蹶而寤由是每日必往其來往之道非復人間  
視天光淡黃所踐地亦黃質軟如綿彼家屋室器物歷  
歷可記還則三人復入心中時二月下旬也旣而三人  
憑文煥體捉筆書偈曰碌碌紅塵二十九一朝緣盡還  
分首從今踏破嶺頭雲更向菩提三藐走雲也有風也  
有一場笑話都成偶分付雲房好待吾呵呵一笑先年  
叟文煥本不知書與文而字頗端楷見者異之是夜見  
其亡父云吾爲兒事費幾籌量前進牒青帝言汝敬惜

廢字合得延算今幸判准以牒示文煥上大書合延壽  
七月以藍筆作一大圍書作行體甚妙父曰向所往處  
終須一到乃攜以往文煥竟氣絕矣既至見門外十數  
人爭欲進其父排衆衆強挽之入至一籠所啟蓋納文  
煥於內覺四周如火欲出不能乃猛力一迸而出踉蹌  
出門遇一人視之卽前三人者頃一人頃又一人三人  
與之同歸至門仍蹶而寤蓋已氣絕數刻矣其父取案  
頭殘茶一吸而去家人視殘已空文煥至丙戌猶存

王虎臣子

長夏閒談 康熙丙戌年間錢塘王虎臣生二子長者

年十六曰廷銓幼者年十三曰廷翰皆秀穎離家半里  
在塾攻書一日回家不知所之於硯下得書一封云吾  
二人成仙去也野鶴本無定跡孤雲別處爲家勿以子  
爲念復有詩一首云兄弟原來是降仙無端誤落雜塵  
烟若非名利生爭奪定爲功名忘性天山月常清供嘯  
傲江雲無盡漫流連雙親欲報將何屬鳥在深林魚在  
淵虎臣鳴於縣其師驗其字跡類二子而詩素非所能  
徧處尋訪絕無影響

氣母

品外錄 辛巳夏暑盛予素病熱因假館怡園園在後

市爲外舅稼村公別業卽南宋中瓦街地疊嶂流泉碧  
蘭花圃頗擅一時之勝值宿雨初霽爽靄竟日予憊極  
午後少息匡床忽夢一素裳淡粧女子腴短而麗年可  
二十許手持木匣數器白方絹束之有似俗婦賣花者  
立檻畔時舅家有某姓妻常與人售物得價殊厚予疑  
爲某呼之不應猝前視之徐曰我非家人何數喚爲予  
詫甚念外舅家規素嚴不知因何而至詰其姓名微哂  
不答展紅綾牋書氣母二字示余筆甚娟秀予默念精  
夫可作對怒曰吾始聞君子爲非常人故得請假柴桑  
君進謁不謂子氣躁神浮乃爾夫父沒不知葬親老不

知養有學不知所以成名顯親僅區區以口舌筆墨間  
謂可畢終身事也豈丈夫自命哉氣躁則志多耗神浮  
則心多欲子宜脊之予遜謝不敏問柴桑君爲何人云  
妾父卽九府丈人弟戴勝君兄也喜居華陽寒碧軒故  
妾幼時有寒碧軒雜咏兒女閨情未免爲大雅所笑未  
便呈政出紅氍二條腥潤可喜與余分坐時仰而望天  
月色微昏迴顧堦石桂柏森然清風鳥聲花香滿徑相  
與論古今人賢否政事得失及南北朝事輒復流涕磧  
面若歛歔不勝感者旋出所著詩詞事紀有名曰懸壺  
記事載多奇幻較搜神夷堅猶過之中所言有不能洞

解憶首章記黃帝年號有泰定乾封之稱又蒼頡姓侯  
剛混沌氏生於石之說皆人所未曉有名金字碧樓集  
者所記多洞天福地後出所著蓮蝕山房詩草示予種  
種不一俱篇首自題一律餘俱他人和詩不復省憶惟  
原唱三首固索予和強記之題懸壺紀事詩曰揚子譚  
元亦偶然鈴聲鐸語慣參禪中流漫說千金易縮地誰  
傳萬里先弱骨身應瑤圃住仙風情斷碧雲牽相思古  
度逢山樹槎入銀河一綫連予和詩云盈虛消息本天  
然駐景壺中好坐禪論學耻居王子後著鞭還懼祖生  
先三山有景非人到一水和愁入夢牽瓊室玉臺春寂

寂海門爭與洞庭連題金宇碧樓集云神女高唐早愛  
才華峯仙掌爲誰開負花沾酒仙都去帶雨敲門木客  
來隋曲樹青悲帝柳驪宮土黑染秦灰江南無限興亡  
事弔古猶存庾信哀予和云秋風團扇婕妤才步出瑤  
宮寶扇開桂子月中歌吹滿蘆花江上笛聲來仙妃有  
意遺鈿合胡女多情布栗灰萬斛愁腸千里夢杜鵑啼  
斷楚猿哀題蓮蝕山房詩云無情柳絮怨東風怨却東  
風三月中春雨洗堦平楚綠遠山銜日夕陽紅衣殘香  
渚愁青鳥花落寒塘浸彩虹閒却玉人樓外望細題新  
句在驪宮予和云乳燕新涼話晚風樹梢綠鎖遠山中



江天雨後全生白蓮渚陰濃半掩紅團露曉濡遊子騎  
片雲閒步美人虹仙踪若許凌風步應欲乘槎入斗宮  
詢以後日行止曰予固一女子耳烏能測君異日所爲  
雖然君宜存一忍字守一靜字以厚居心以正行事庶  
免不虞之禍其他鵬程萬里何患無之又語終身數事  
囑勿洩贈予詩曰冷露秋花帶葉乾曉鶯啼徹玉闌干  
雲歸松澗連山碧霜染楓林盡日丹三島有仙芝草潤  
九天無雨竹枝寒秦臺不用閒吹簫喚醒紅塵鶴夢殘  
予答詩云漫笑奇章浪得名疑來閬苑喚卿卿秋雲怕  
冷香何在金谷園荒草不生富貴那看遊客夢江山無

限故人情樓居未必長安好爭上崑崙第五城俄袖出  
一盒啟視中多佳餚引予就酌進有鵝梨羹甫下箸忽  
忽爲家人呼醒蓋將晚餐也時色已暮覺燈影徘徊暗  
香凝室癡然如醉不知所措謹就納涼之暇援筆識之  
并附三律誌其異非敢故作欺人語聊作癡人說夢一  
醒長夏睡魔耳附詩云夢想難分幻與真黃梁未熟枕  
中春堪嗟鄴下櫻桃客曾記江頭菱芡人貧豈抑揄逢  
路鬼卧聞歌笑識心神月明如畫花如雪贏得師雄有  
後身落盡槐花滿地黃庭前細細有餘香桃笙午倦尋  
新夢薤簟風涼記古杭鼓瑟至今悲弟子行雲何處會

襄王漢家舊是繁華館日暮林燈出泰行壓簾金線日  
初遲引睡蟬聲噪午枝倦倚綠窗歌窈窕閒拋紅豆記  
相思桐花永壽寺中語青草池塘夢裏詩陽彥不須誇  
許彥幾回欲說更情癡

錢塘渡江僧

灤陽消夏錄 范蘅洲言昔渡錢塘江有一僧附舟徑  
置坐具倚檣杆不相問訊與之語口漫應目視他處神  
意都不屬蘅洲怪其傲亦不再言時西風過急蘅洲偶  
得二句曰白浪簸舡頭行人怯石尤下聯未屬吟哦數  
四僧忽閉目微吟曰如何紅袖女尚倚最高樓蘅洲不

省所云再與語仍不答比繫纜恰一少女立樓上正著  
紅袖乃大驚再三致詰曰偶望見耳然烟水淼茫廬舍  
遮映實無望見理疑其前知欲作禮則已振錫去蘅洲  
惘然莫測曰此又一駱賓王矣

章明玉妻絕命詞

秋燈叢話 錢塘章明玉妻汪氏色美而才琴瑟最調  
章客楚中夢抵家杳無人跡惟見壁間題二絕云寂寂  
花時鎖院門綠窗風破月黃昏海棠開落花無主誰惜  
亭亭倩女魂草草春風十七年漫嗟紫玉竟成烟他時  
却扇重相見珍重蕉窗話舊緣覺憶詩句不祥急束裝

歸而妻已物故矣章哭之慟搜箱篋得絕命詩二章正  
夢中所見也屢議婚未諧後官粵東從化令始續絃李  
氏却扇時面龐酷肖前妻審其生辰卽汪之逝日也細  
話前事適窗外微雨滴芭蕉淅瀝可聽屈指歲月已十  
有七載矣

泥美人善吟咏

秋燈叢話 餘姚富翁某延師訓子館中圖書玩物畢  
具復有山塘泥美人一座神采生動置几旁師一夕坐  
讀忽有美婦人來服飾艷麗何師調笑師驚喜如出望  
外遂相燕好美人善吟咏嘗賦七律以贈淒清婉麗師

寶藏之詩曰妾家生長在姑蘇飄泊如今未有夫竊恨  
生晨纏水土還憐身世入泥塗何緣珍重藏金屋祇可  
淒其伴鳴爐一自畫眉人去後消磨脂粉孰重敷美人  
屢囑師無外洩而主人訝師精神恍惚因問焉不告一  
日師外出主翁至館翻閱所讀秘本詩箋在焉方諷誦  
間師已至主人睨几上美人笑曰得非此物爲崇耶美  
人衣裾栩栩欲動頰上似有慙色擲而碎之後師夜讀  
無復美人來矣

靈隱寺異僧

秋燈叢話 朱方伯一蜚浙江嘉興人未遇時遊西湖

有異僧自滇來卓錫靈隱寺往問科名僧曰君非科目中人也來秋當點冊龍門觀諸生綴隊入場耳朱愕然僧笑曰非誑語旬日當有驗未幾接舅氏錢少宗伯以塏書已爲祁奚之薦趣其赴都朱置書靴中趨寺謁僧僧迎問曰君靴中物吾言驗矣乃驚服叩問終身僧書一紙授之曰一帆風午時下再問不答堅請之復書曰若再起功名大朱北上試用晉省署陽曲令值省試果點冊如僧言後歷任至方伯被論去職卽捐館年止五十或謂帆音類藩午時類五十蓋預知位終於藩而壽則大衍之數也

王申旅櫬求遷葬

秋燈叢話 紹興田某精刑名乾隆初江夏胡公格介  
晉江延入幕園有鹿衆每戲逐之田偶疾夢一人盛服  
而前曰予亦紹人曾慕此卒葬後園槐樹下逐鹿者蹂  
躪難堪憐而遷之感切泉壤矣問姓名不答醒以訖置  
之越數日疾劇復夢其人持片紙謂曰君謹識勿忘視  
之書一絕誰將墓碣姓名鐫闡發幽光盡在田莫謂東  
西伴已失尾頭阡陌更相連驚覺汗流浹背尋瘞掘地  
得棺厝諸郊繹詩意始悟田字去東西王也有頭尾申  
也必王姓申其名遂鐫石表墓歸紹訪之果有其人客



死於閩家極貧乃厚卹之令扶櫬歸

### 湖上花妖

夜談隨錄 商邱宋文學客禹航僦居湖干柴門面湖  
夏秋之間蓮花最盛宋性故愛蓮有詩百首咏之會夏  
日倚門縱目見二女郎操艇子來採蓮一衣紅一衣紫  
姿態甚美而衣紅者尤艷絕次日復至大約由來西去  
比日皆然宋以言挑之曰蝸居在望何不一過紫衣女  
櫂舡近岸宋大喜踴躍爲導詢及姓氏里居紅衣女曰  
兒名藕花小婢名菱花家在湖上不遠土著也是夕遂  
止留雞鳴言別謂宋曰荷君雅愛請以實告兒輩非人

實花妖也君苟不棄祈至湖上見芙蓉中有一莖紅鮮  
異常者卽其下有菱花一簇可盆移歸勿傷其寸根片  
葉植諸盆中養以湖水勿畜六擾勿接惡客則兒與菱  
花常得朝夕相對矣宋謹誌之旭日始旦卽覓小舟徧  
閱花中果有一莖大倍凡品其下有菱花迥異募漁人  
盆泥移歸培植巨盆中閉門謝客終日坐卧其側至第  
四日二女已至榻前矣相見驚喜藕花因宋詩曰彈指  
韶光易老瞥眼初陽又曛從此朝朝暮暮不隔秋水思  
君自此三人如形影之隨不離跬步一日宋他出二友  
過訪不值見盆中菱花秀異采之而去日暮宋歸藕花

泣訴菱花被創之由君不憐而救之兒豈能獨生宋大  
慟問何術以救之女曰但培其根每清晨爲誦觀音咒  
九九遍明年此際可以再生矣宋如所教次年復出菱  
花忽至相見悲喜交集又一年隆冬大雪盆水一夜寒  
洏二芳不至忽春盡夏來藕花獨至形容憔悴宋問何  
爲辱困至此菱花安在不與偕來女泣曰尚憶菱妹耶  
已作凍鬼隔年矣兒亦不耐嚴寒奄奄一息不久亦將  
辭人世與君永訣耳自是藕花日就瘠羸宋夏之延醫  
調治醫一見失志漫留藥一刀圭誌其門逕而去雖去  
日伺於門冀其一面適宋又他出是日薄暮醫伶見藕

花獨坐湖上醫突前抱持之藕花駭而逸躍身湖中醫  
荒持其足足折視之藕一段耳始知其妖幻亟告宋宋  
大痛恨趨湖上哭之作芙蓉咏以弔之遂髡緇爲比丘  
雲遊不知所終

題詩邯鄲客舍

徐巖叟詩選 和邯鄲客舍題壁詩并序云壬辰余北  
上同胡葵太守沈渭濱廣文邸宿見室隅殘墁間有女  
子題詩云獨坐幽齋夜氣清可堪風雨作秋聲典釵沽  
酒偕君醉揀史燒燈快我評事業到來都未是英雄當  
下只爭名自慚弱質非男子閨閣沈埋愧此生妾錢塘

全宋言言 卷三  
人也因離亂隨征詩不敢怨情見乎辭三人讀之蓋沈  
婉悲壯字法亦質秀而屬和者寡夫且姓氏不留又安  
望後來者之和之也因代爲之抒怨云客窗夜雨氣淒  
清曲寄琵琶寫怨聲蔡氏無金空憶贖班家有史只心  
評愁從北塞施新粉耻向西湖說舊名古壁半欹香字  
斷淚痕猶漬碧苔生

連蕙蘭

簪雲樓

雜記

順治壬辰禁良爲娼以喪亂後良家子

被虜轉流落樂籍故

世祖特有是命其誤落於娼者

許平價贖歸都下甚快之妓連蕙蘭因事繫獄曾以書

于岳石帆有句云含羞羞婦亭前獨語語兒溪畔岳爲  
致當路釋之一時傳爲佳句

鳬亭先生初號篁邨博洽羣書吐屬淵雅世家陶  
堰遷居於蕭久矣輝祖年十三四震其名心嚮往  
之相隔城鄉未由親炙越三年入城應童子試方  
謂可圖晉謁而先生已倣裝壯上矣嗣後輝祖奔  
走衣食先生亦歷遊五嶺三山仰望彌殷雲波阻  
絕又二十餘年獲交哲嗣廷珍廷琬竊聞餘論私  
淑良多追先生倦遊歸里始得拜於庭下時先生  
年屆杖鄉輝祖亦四十有三矣邑中好學之士幸

見顏色喜若登龍問字質疑求詩古文者屢滿門  
巷教者幾幾舌欲敝腕為脫於是渡江至葛嶺下  
小築數椽避喧娛老署曰泊鷗莊莊中有沼沼中  
有鳬亭禽魚滿目風月宜人頌而樂之因即以鳬  
亭自號而海內人挂諸齒頰者仍其故號焉輝祖  
客吳興往來錢唐必過湖上乃益習先生之為粹  
然儒者愈敬而親之先生亦雅愛輝祖不以弁陋  
是棄泊輝祖宦楚歸林蒙出示全浙詩話若干卷  
受而讀焉網羅今古雖一嚮半矣俱堪含咀愈嘆  
其用心虛而致力勤也以先生之才之學欲成一

書自可刻日歲事使其徑伸已說不必有所根據  
則吾測詩人警句何難日輯萬言即吾越名篇車  
載斗量奚至寥寥若此則其以述為例不以作為  
例也明甚故歷十有七年之久始得裒然成集自  
鍾嶸詩品以來詩話相仍非開標榜之風即近阿  
私之好是書一洗而空之讀詩者可以知人攷古  
者可以論世誠說詩之極軌也世之閱是編者既  
知其為古今已成之話而非膏局者新構之話則  
話所不及之人雖聞人不求其備話所不及之句  
雖佳句何憾於遺若恐其挂漏猶欲憑臆見而品



題增益之是亂其例矣豈先生纂輯之意哉嘉慶  
元年六月六日淵愚姪汪輝祖謹跋

全浙詩話卷五十四終